

2015 Rhif (Cy.)

ADDYSG, CYMRU

**Rheoliadau Addysg Uwch
(Cynlluniau Ffioedd a Mynediad)
(Hysbysiadau a Chyfarwyddydau)
(Cymru) 2015**

NODYN ESBONIADOL

(Nid yw'r nodyn hwn yn rhan o'r Rheoliadau)

Mae'r Rheoliadau hyn yn gwneud darpariaeth mewn cysylltiad â chyfarwyddydau o dan adran 11 o Ddeddf Addysg Uwch (Cymru) 2015 ("Deddf 2015") a dyroddi ac adolygu'r hysbysiadau a'r chyfarwyddydau hynny a bennir yn adran 41(1) o Ddeddf 2015.

Mae rheoliad 3 yn darparu bod rhaid i CCAUC ar unwaith roi copi o gyfarwyddyd a roddir o dan adran 11 o Ddeddf 2015 i Weinidogion Cymru. Mae'r rheoliad hefyd yn darparu ar gyfer sut y mae rhaid i CCAUC gyhoeddi'r cyfarwyddyd hwnnw.

Mae rheoliad 4 yn rhagnodi'r amser a'r modd y caniateir i sylwadau gael eu gwneud ynddynt mewn cysylltiad â hysbysiadau a chyfarwyddydau arfaethedig. Mae rheoliad 5 yn nodi pryd y mae hysbysiadau a chyfarwyddydau i'w trin fel pe baent wedi eu rhoi.

Mae rheoliad 6 yn nodi'r wybodaeth y mae rhaid ei rhoi gyda hysbysiadau a chyfarwyddydau.

Mae rheoliad 7 yn rhagnodi'r seiliau y caniateir i gais am adolygiad o hysbysiad neu gyfarwyddyd gael ei wneud arnynt. Mae rheoliad 8 yn nodi'r weithdrefn y mae rhaid i gorff llywodraethu ei dilyn er mwyn gwneud cais am adolygiad o hysbysiad neu gyfarwyddyd.

Mae rheoliad 9 yn nodi'r weithdrefn sydd i'w dilyn gan y person, neu banel o bersonau, a benodir gan Weinidogion Cymru i adolygu hysbysiadau a chyfarwyddydau. Mae rheoliad 10 yn rhagnodi'r weithdrefn ar ôl adolygu.

2015 Rhif (Cy.)

ADDYSG, CYMRU

**Rheoliadau Addysg Uwch
(Cynlluniau Ffioedd a Mynediad)
(Hysbysiadau a Chyfarwyddydau)
(Cymru) 2015**

Gwnaed ***

*Gosodwyd gerbron Cynulliad Cenedlaethol
Cymru* ***

Yn dod i rym ***

Mae Gweinidogion Cymru, drwy arfer y pwerau a roddwyd gan adrannau 11(5), 42(2)(d), 43(c) a 44(3) o Ddeddf Addysg Uwch (Cymru) 2015(1), yn gwneud y Rheoliadau a ganlyn:

Enwi, cychwyn a chymhwyso

1.—(1) Enw'r Rheoliadau hyn yw Rheoliadau Addysg Uwch (Cynlluniau Ffioedd a Mynediad) (Hysbysiadau a Chyfarwyddydau) (Cymru) 2015.

(2) Daw'r Rheoliadau hyn i rym ar [] ac maent yn gymwys o ran Cymru.

Dehongli

2. Yn y Rheoliadau hyn—

ystyr “Deddf 2015” (“*the 2015 Act*”) yw Deddf Addysg Uwch (Cymru) 2015;

ystyr “panel adolygu” (“*review panel*”) yw'r person, neu banel o bersonau, a benodir gan Weinidogion Cymru o dan adran 44(2) o Ddeddf 2015.

Cyfarwyddydau cydymffurfio ac ad-dalu

3. Os yw CCAUC yn rhoi cyfarwyddyd o dan adran 11 o Ddeddf 2015, rhaid iddo—

- (a) ar unwaith roi copi o'r cyfarwyddyd hwnnw i Weinidogion Cymru;
- (b) cyhoeddi copi o'r cyfarwyddyd ar ei wefan—
 - (i) erbyn saith niwrnod sy'n dechrau â'r dyddiad y rhoddir cyfarwyddyd fan bellaf,
 - (ii) hyd nes bod CCAUC yn dirymu'r cyfarwyddyd neu fod CCAUC wedi ei fodloni y cydymffurfiwyd â'r cyfarwyddyd.

Sylwadau mewn cysylltiad â hysbysiadau a chyfarwyddydau arfaethedig: hysbysiadau rhybuddio

4. At ddibenion adran 42(2)(d) o Ddeddf 2015, rhaid i sylwadau gael eu gwneud yn ysgrifenedig i CCAUC(1) cyn diwedd 40 o ddiwrnodau sy'n dechrau â dyddiad yr hysbysiad rhybuddio.

Trin hysbysiadau a chyfarwyddydau

5. Mae hysbysiad neu gyfarwyddyd a bennir yn adran 41(1) o Ddeddf 2015 i'w drin fel pe bai wedi ei roi ar y diwrnod y digwydd y cyntaf o'r digwyddiadau a ganlyn—

- (a) bod y corff llywodraethu yn hysbysu CCAUC yn ysgrifenedig ei fod yn derbyn yr hysbysiad neu'r cyfarwyddyd;
- (b) bod y terfyn amser ar gyfer gwneud cais am adolygiad o'r hysbysiad neu'r cyfarwyddyd o dan adran 44 o Ddeddf 2015 wedi dod i ben ac nad yw'r corff llywodraethu wedi gwneud cais am adolygiad;
- (c) bod adolygiad o'r hysbysiad neu'r cyfarwyddyd o dan adran 44 o Ddeddf 2015 wedi gorffen a bod CCAUC wedi hysbysu'r corff llywodraethu yn ysgrifenedig fod yr hysbysiad neu'r cyfarwyddyd yn sefyll.

Yr wybodaeth sydd i'w rhoi gyda hysbysiadau a chyfarwyddydau

6. Rhaid i ddatganiad a ddyroddir yn unol ag adran 43 o Ddeddf 2015 gynnwys yr wybodaeth a ganlyn—

- (a) dyddiad dyroddi'r hysbysiad neu'r cyfarwyddyd;

(1) Cyngor Cyllido Addysg Uwch Cymru.

- (b) pryd y mae'r hysbysiad neu'r cyfarwyddyd i'w drin fel pe bai wedi ei roi;
- (c) y seiliau yn rheoliad 7 y caniateir i gais am adolygiad gael ei wneud arnynt;
- (d) y weithdrefn yn rheoliad 8 y mae rhaid i gorff llywodraethu ei dilyn er mwyn gwneud cais am adolygiad;
- (e) enw a chyfeiriad y panel adolygu y mae rhaid gwneud cais iddo am adolygiad.

Y seiliau dros adolygu hysbysiadau a chyfarwyddydau

7. Caniateir i gais am adolygiad o hysbysiad neu gyfarwyddyd o dan adran 44 o Ddeddf 2015 gael ei wneud ar un neu ragor o'r seiliau a ganlyn—

- (a) bod y corff llywodraethu yn cyflwyno ffactor sylweddol i'w ystyried nad oedd wedi ei ddwyn i sylw CCAUC o'r blaen am reswm da;
- (b) bod y corff llywodraethu o'r farn i CCAUC ddiystyru ffactor sylweddol y dylai fod wedi ei ystyried;
- (c) bod y corff llywodraethu o'r farn bod yr hysbysiad neu'r cyfarwyddyd yn anghymesur yng ngoleuni'r holl ffeithiau perthnasol a gafodd eu hystyried gan CCAUC.

Y weithdrefn i wneud cais am adolygiad o hysbysiad neu gyfarwyddyd

8. Rhaid i gais am adolygiad o'r hysbysiad neu'r cyfarwyddyd—

- (a) cael ei wneud yn ysgrifenedig i'r panel adolygu cyn diwedd 40 o ddiwrnodau sy'n dechrau â dyddiad dyroddi'r hysbysiad neu'r cyfarwyddyd;
- (b) pennu'r seiliau dros yr adolygiad;
- (c) cynnwys y canlynol—
 - (i) copi o'r hysbysiad neu'r cyfarwyddyd i'w adolygu;
 - (ii) copi o'r datganiad a ddyroddir yn unol ag adran 43 o Ddeddf 2015;
 - (iii) gwybodaeth i gefnogi'r cais.

Y weithdrefn adolygu

9.—(1) Mae'r rheoliad hwn yn gymwys pan fo cais am adolygiad wedi ei wneud.

(2) Rhaid i'r panel adolygu roi i CCAUC—

- (a) manylion am yr hysbysiad neu'r cyfarwyddyd i'w adolygu;

- (b) manylion am y seiliau y mae'r cais am adolygiad wedi ei wneud arnynt;
- (c) copi o'r wybodaeth a ddarparwyd gan y corff llywodraethu i gefnogi'r cais am adolygiad.

(3) Caiff y panel adolygu wneud cais ysgrifenedig am wybodaeth bellach oddi wrth naill ai CCAUC neu'r corff llywodraethu at ddibenion yr adolygiad. Rhaid i unrhyw gais am wybodaeth bellach a wneir gan y panel gael ei anfon i CCAUC a'r corff llywodraethu ar yr un pryd.

(4) Rhaid i CCAUC neu'r corff llywodraethu ddarparu unrhyw wybodaeth bellach y mae'r panel adolygu yn gwneud cais amdani cyn diwedd 28 o ddiwrnodau sy'n dechrau â dyddiad y cais.

(5) Rhaid i'r panel adolygu—

- (a) darparu copi o unrhyw wybodaeth bellach a geir oddi wrth CCAUC i'r corff llywodraethu, ac unrhyw wybodaeth bellach a geir oddi wrth y corff llywodraethu i CCAUC;
- (b) ystyried unrhyw wybodaeth a gyflwynir gan CCAUC neu'r corff llywodraethu;
- (c) llunio adroddiad ysgrifenedig ar yr adolygiad a'i ganfyddiadau;
- (d) anfon copi dyddiedig o'i adroddiad i CCAUC a'r corff llywodraethu ar yr un pryd.

Y weithdrefn ar ôl adolygu

10.—(1) Yn dilyn adolygiad o dan adran 44 o Ddeddf 2015, rhaid i CCAUC ystyried adroddiad y panel adolygu ac ailystyried ei benderfyniad i ddyroddi'r hysbysiad neu'r cyfarwyddyd.

(2) Cyn diwedd 40 o ddiwrnodau sy'n dechrau â dyddiad adroddiad y panel adolygu, rhaid i CCAUC hysbysu'r corff llywodraethu yn ysgrifenedig pa un a yw'r hysbysiad neu'r cyfarwyddyd yn sefyll ai peidio, a darparu rhesymau dros y penderfyniad hwnnw.

Enw

Y Gweinidog Addysg a Sgiliau, un o Weinidogion

Cymru

Dyddiad